

## □ الشيخ فتحى الحرامى □

دروس دين ورياضة وحاجة حلوة قوى .  
مش قادر أقولك احنا مبسوطين قد إيه ؟ وكفاية رضا ربنا علينا .  
وبينى وبينك يا أستاذ الحكومة الموجودة اليومين دول كويسة ،  
مش زى الحكومة دوكها ، البيه ظابط المباحث ندهلنا عنده فى  
البدرشين ، وسقانا قهوة فى مكتبه ، أبى والله ، أول مرة نشرب قهوة مع  
الحكومة وقال لنا أنا عارف انتومين وكنتم إيه قبل كده . لكن دلوقت  
أنا مبسوط منكم قوى ، السكة اللى انتو ماشيين فيها دلوقت هى  
السكة الصح .

وربنا يوفقكم وياريت تهدوا كل الناس اللى زيكو .  
كان هذا اللقاء هو آخر عهدى بفتحى .. غادرت مصر فى رحلة .  
امتدت مائة شهر كاملة ، ثم عدت فى عام ١٩٨٢ ومرت أربعة عشر  
عاما طويلة دون أن يقع بصرى على فتحى ، ولم يحاول فتحى  
الاتصال بى ، وتصورت أنه إما غادر القاهرة وإما انتقل إلى رحاب الله .  
ومنذ أسابيع قليلة وقع بصرى عليه ، صورته منشورة فى جميع  
الجرائد اليومية . فتحى بلحمه وشحمه ، مطلوب القبض عليه فى  
حادث سطو على محل مجوهرات فى الصعيد ، يا قوة الله ، الشيخ  
فتحى الحرامى عاد إلى مهنته القديمة ولكن فى ملابس جديدة ، وبعد  
أن هادنته الحكومة وشرب قهوة مع البيه ظابط المباحث ، ودعا له  
بالتوفيق فى هداية أمثاله من الحرامية والنشالين !  
كم كنا فى منتهى السذاجة جميعا ، الحكومة والناس والعبد لله  
أيضا كان على رأس طابور المغفلين !